

ՎԱՐԴԻԹԵՐ ԳՐԻԳՈՐՅԱՆ
Հայաստանի ազգային արխիվ

**ՔԱՂԱՆԱՅԱԿԱՆ ՍՊԱՍԱՎՈՐՈՒԹՅԱՆ ԽՆԴԻՐԸ ԴԱՅ ԱՌԱՔԵԼԱԿԱՆ ՍՈՒՐԲ
ԵԿԵՂԵՑՈՒ ՎՐԱՍՏԱՆԻ ԵՒ ԻՄԵՐԵԹԻ ԹԵՍՈՒՄ
(ԺԹ. ՂԱՐԻ ԵՐԿՐՈՐԴ ԿԵՍ – Ի. ՂԱՐԻ ԱՌԱՋԻՆ ՏԱՄՆԱՍՅԱԿ)**

Քաղանայական սպասավորության խնդիրը մշտապես եղել է Հայ Առաքելական Սուրբ Եկեղեցու ուշադրության ներքո: Ծխական կյանքի կազմակերպման գործընթացում քաղանա-ծխականներ առողջ հարաբերությունների ձևավորումը կախված էր ինչպես ծխականների՝ համայնքային կյանքին ներգրավվածության աստիճանից, այնպես էլ քաղանայի անձնական որակներից, պատրաստվածության մակարդակից, ծխականների շրջանում որպես հոգեւորական ունեցած հեղինակությունից: Հայ Առաքելական Սուրբ Եկեղեցու Վրաստանի եւ Իմերեթի թեմում բարձրագույն հոգեւոր իշխանությունները մշտապես փորձում էին թույլ չտալ ծուխ-հոգեւոր իշխանություն հարաբերություններում հնարավոր անջրպետի առաջացում՝ ուշադրությունը սեւեռելով քաղանայական դասի խնդիրներին:

Վրաստանի եւ Իմերեթի թեմի բարձրագույն հոգեւոր իշխանությունների ֆայլերը փառանայական սպասավորության խնդրի լուծման ուղղությամբ. Վրաստանի եւ Իմերեթի թեմում առկա էին քաղանայական սպասավորությանն առնչվող որոշակի խնդիրներ: Թեմական իշխանություններին հատկապես մտահոգում էին քաղանայական դասի վարկանիշի օրեցօր նվազումն ու հեղինակազրկումը: Ծխական քաղանայի՝ ժողովրդի շրջանում որպես Հայ Եկեղեցու անմիջական ներկայացուցչի կերպարի որոշակի հեղինակազրկումը արդյունքն էր մի շարք խնդիրների, որոնք կուտակվել էին տասնամյակների ընթացքում: Դրանք բազմաթիվ էին, որոնցից խորքային նշանակություն ունեին հատկապես քաղանայների վարձատրության եւ նրանց կրթական մակարդակի խնդիրները:

Քաղանայական սպասավորության խնդիրը մշտապես եղել է հայ եկեղեցական եւ աշխարհական գործիչների ուշադրության կենտրոնում. դրա շուրջ բուռն քննարկումներ ծավալվեցին հատկապես ԺԹ. դարի 80—90-ական թվականներին եւ Ի. դարի սկզբին՝ Հայ Եկեղեցու բարենորոգության տարիներին:

Բարեկարգման ենթակա խնդիրների (եկեղեցու վարչական կառույցին, թեմերին, կաթողիկոսական ընտրությունը, կուսակրոնությունը եւ մի շարք այլ հարցերի առնչվող) շրջանակը բավական ընդգրկուն էր։ Սակայն Ի. դարասկզբին հայ հասարակական կյանքում տեղի ունեցող իրադարձությունների շարակարգում վերջինս բաժանվում է երկու հիմնական ոլորտի՝ քահանայական սպասավորության եւ Սուրբ Էջմիածնի միաբանության հարցերի։ Խնդիրն առավել բարդանում էր այն պատճառով, որ մշտապես ենթարկվում էր իրավիճակային լուծումներին¹։

Վրաստանի եւ Իմերեթի թեմում քահանայական սպասավորության խնդրի լուծման ուղղությամբ գործուն քայլեր ձեռնարկվեցին հատկապես Ժ. դարի 80-ական թվականներին, երբ թեմակալ առաջնորդի պաշտոնն ստանձնեց Արիստակես եպս. Սեդրակյանցը (1883–1889)²։ Թեմական կառավարման համակարգի բարեկարգումը նա որոշեց սկսել Թիֆլիսից՝ փորձելով վերակազմավորել քահանայական դասը եւ բարելավել թեմի նյութական-տնտեսական դրությունը։

Այդ եւ այլ հարցերի քննման նպատակով՝ Արիստակես եպս. Սեդրակյանցը կազմեց վեց անդամից բաղկացած հատուկ հանձնաժողով («Հանձնաժողով առաջնորդական յանձնարարությունը»)՝

Հանձնաժողովը նախ եւ առաջ կազմեց հաստիքացուցակ, որով Թիֆլիսի քահանաների թիվը պետք է կրճատվեր մինչեւ 51-ի³։ Թիֆլիսի բոլոր եկեղեցիները միասին ունեին մոտ 6131 ծուխ, 65 քահանա⁴, 5 սարկավազ, 13 դպիր։ Խնդրի լուծման համար հանձնաժողովը որոշեց ձեռնարկել հետեւյալ քայլերը՝

- կրճատել քահանաների թիվը,
- հիմնել ապահովության գանձարան,
- վերացնել դպրական շրջիկ գանձանակները՝ փոխարենը դպիրներին եւ սարկավազներին նշանակել որոշակի վարձատրություն⁵։

¹ Այդ մասին տե՛ս Հ. Հովսեփյան, Հայ Առաքելական եկեղեցու բարենորոգության հիմնահարցը 1901–1906 թթ., Երեւան, 2008, էջ 176–177, 190–191։

² Արիստակես եպս. Սեդրակյանցի կենսագրությունը եւ մահախոսականը տե՛ս «Արարատ» ամսագիր, Ա., 1907, էջ 51–54։

³ Տե՛ս ՀԱԱ, ֆ. 175, ց. 1, գ. 7, թ. 19–20։

⁴ Տե՛ս անդ, գ. 7, թ. 45։ Ժողովրդից տուրքեր եւ նվերներ հավաքելու համար 1883 թ. կազմված ժամանակավոր ծրագիրը տե՛ս ՀԱԱ, ֆ. 57, ց. 1, գ. 216, թ. 2–4։

⁵ 1885 թ. դրությամբ ամբողջ թեմում սպասավորում էր 400-ից ավելի քահանա. անվանացանկը տե՛ս ՀԱԱ, ֆ. 35, ց. 1, գ. 3, թ. 1–139։

⁶ Տե՛ս ՀԱԱ, ֆ. 175, ց. 1, գ. 6, թ. 7–8։

Հանձնաժողովը նշալ քայլերով հույս ուներ կարճ ժամանակահատվածում որոշակի արդյունքի հասնել: Հարցի արմատական լուծումը հանձնաժողովի անդամները տեսնում էին քահանաների համար աշխատավարձ սահմանելու մեջ: Սակայն դրա համար, ինչպես իրենք էին մտածում, ժամանակ էր հարկավոր՝ մինչև «Քահանաների ապահովության գանձարանը» կհարստանար կողմնակի եկամուտներով, կամ ժողովրդի շրջանում կհասունանար նրանց կանոնավոր աշխատավարձ սահմանելու միտքը:

Արիստակես եպս. Սեդրակյանցը չկարողացավ ավարտին հասցնել ձեռնարկած քայլերը՝ 1889 թ. թեմակալ առաջնորդի պաշտոնից հրաժարվելու պատճառով: Ավելի ուշ՝ Ի. դարասկզբին, նա իր տեսակետները հասարակությանը ներկայացրեց առանձին գրքուկով⁷:

Քահանայության եւ թեմում առկա մյուս խնդիրների լուծման ուղղությամբ աշխատանքները շարունակվեցին նաեւ Գեւորգ արքեպս. Սուրենյանցի առաջնորդության շրջանում (1894—1904)⁸:

Քահանաների կեցության պայմանները որոշակիորեն բարելավելու նպատակով՝ 1895 թ. վերահիմնվեց «Քահանաների ապահովության գանձարանը»⁹, որի կանոնադրությունը հաստատվեց 1897 թ.¹⁰: Գանձարանը պետք է հավասարաչափ նպաստ բաշխեր ինչպես Թիֆլիսի բոլոր քահանաներին, այնպես եւ հոգեւորականների որբերին ու այրիներին: Գանձարանի միջոցները պետք է գոյանային նվիրատվությունների եւ Թիֆլիսի գերեզմանատներից ստացվող եկամուտների հաշվին¹¹:

Ավելի ուշ՝ 1900 թ., քահանաների ամսական վարձատրության նշանակման առաջին փորձը կիրառվեց Բաթումում: Բաթումի գործակալ Մեսրոպ քհն. Մելլանն այդ առնչությամբ գրում է, որ տեղի հայերի շրջանում օգտակար նորույթ է տեղ գտել, որի շարունակության դեպքում շատ խնդիրներ լուծում կստանան: Բաթումցի բազմաթիվ ծխականներ,

⁷ Այդ մասին տե՛ս Արիստակես եպո. Սեդրակյանց, Քահանայական խնդիր, Մոսկուա, 1900, էջ 1—220:

⁸ Հայ Առաքելական Սուրբ Եկեղեցու Վրաստանի եւ Իմերեթի թեմում նրա իրագործած բարենորոգումների մասին տե՛ս В. Григорян, Об оптимизации системы управления Грузино-Имеретинской епархии (1894—1904), «Բանբեր հայագիտության», 2018, թ. 2, էջ 100—109:

⁹ Թիֆլիսի հայոց հոգեւորականության ապահովության գանձարանը գործել է մինչև 1921 թ.: Ապահովության գանձարանի արխիվային գործերը տե՛ս ՀԱԱ, ֆ. 231, ց. 1, գ. 1—60:

¹⁰ Տե՛ս ՀԱԱ, ֆ. 35, ց. 1, գ. 76, թ. 21:

¹¹ «Քահանաների ապահովության գանձարանի կանոնադրություն», հոդ. 2, 3 (տե՛ս անդ, գ. 76, թ. 64—66):

դիմելով Հայոց հայրապետին, տեղեկացնում են տեղի երկու քահանայի համար ամսական վարձատրություն նշանակելու մասին՝ պայմանով, որ դրա փոխարեն նրանք կդադարեն ծխերից դրամ հավաքել, իսկ համայնքը կվճարի եկեղեցական տուրքերը: Վեհափառ Հայրապետը հավանություն է տվել այդ որոշմանը եւ հաստատել քահանաներին աշխատավարձ նշանակելը: Այսպիսով, տարեկան որոշակի աշխատավարձով քահանա ունենալու առաջին օրինակը ցույց է տալիս Բաթումի հայ հասարակությունը¹²:

Չնայած Բաթումի օրինակին՝ քահանաներին աշխատավարձ սահմանելը մնաց քննարկումների փուլում եւ համընդհանուր բնույթ չստացավ: Այսպես՝ 1910 թ. Թիֆլիսի հայ քահանաների ապահովության գանձարանի վարչության՝ Վրաստանի եւ Իմերեթի թեմի կոնսիստորիային¹³ ուղղված գրության մեջ ասվում է, որ քաղաքի բոլոր քահանաները հրավիրվում են կոնսիստորիայի գրասենյակ՝ հաշվետեսներից ստացած նախկին վարչության հաշիվները զեկուցելու եւ քահանաներին ուճիկ նշանակելու նպատակով կանոններ մշակող մի հանձնաժողով ընտրելու համար¹⁴:

Խնդրահարույց էր նաեւ քահանայական ընտրությունների կազմակերպումը: Դրանց անցկացման ընթացքի մասին հետեւյալ տեղեկություններն է հաղորդում Գարեգին վրդ. Հովսեփյանը. «Քրիստոնէական նախնի սովորութեան համաձայն՝ քահանայացուների ընտրութիւնը Հայաստանեայց Եկեղեցու մէջ կախուած է համայնքից կամ ծխականներից: Հին ժամանակներից ընտրութեան որոշ ձեւ, եղանակ չէ հասել մեր ձեռքը. այժմ քահանայացուն անձամբ կամ նորա բարեկամներից մէկը նախօրօք պատրաստուած համախօսականը շրջեցնում է տնէ տուն, խանութէ խանութ եւ ստորագրել տալիս: Բաւական է ստորագրողների թիւը 100-ից անցաւ, համախօսականը պատրաստ է: Այսպիսի դէպքերում խնդիրք, աղաչանք, երբեմն մինչեւ կաշառք»¹⁵:

Հավելենք, որ ազգային կուսակցությունների գործունեության շրջանում քահանայական ընտրությունները երբեմն վերածվում էին կուսակցությունն ընդլայնելու հնարավորության: Քահանայի տեղի համար ստորագրություններ հավաքելու գործում նրանք պայքարում էին միմյանց

¹² Տե՛ս «Արեւելք», 1900, թ. 4333, էջ 1:

¹³ Թեմական կառավարման կենտրոնական վարչական մարմին:

¹⁴ Տե՛ս ՀԱԱ, ֆ. 35, ց. 1, գ. 567, թ. 2:

¹⁵ ԳԱՐԵԳԻՆ ՎՐԴ. ՅՈՎՍԷՓԵԱՆ, Քահանաների ընտրութեան եղանակը, «Արարատ», Գ., 1900, էջ 101:

դեմ: Նման դեպքերում քահանան կարող էր հոգեւոր գործառույթներ իրականացնողից վերածվել «կուսակցականի»¹⁶:

1905 թ. Սուրբ էջմիածնի սինոդը, քահանաների ընտրության եղանակի եւ ձեռնադրության բարեկարգման նպատակով, երեք մասից բաղկացած (քահանայական ընտրություն, քահանայի պատրաստություն, ուսման վկայականի հետ կապված հարցեր) հատուկ ծրագիր մշակեց («Ծրագիր կանոնաց»):

Բարձրագույն հոգեւոր իշխանությունը, թողնելով համախոսականի միջոցով աշխարհականների մասնակցությամբ քահանաներ ընտրելու եղանակը, փորձում է որոշակի չափորոշիչներ սահմանել: Օրինակ՝ համախոսականի հետ միասին անհրաժեշտ էր ներկայացնել նաեւ թեկնածու քահանայի ուսման վկայականը, որի չլինելու դեպքում չէր ընդունվելու նաեւ համախոսականը: Հստակեցվում էր նաեւ, թե որ դեպքում էր օրինական համարվում այս կամ այն համախոսականը: Քահանայական ձեռնադրության համար նվազագույն տարիքային շեմ է սահմանվում 25-ը, իսկ առավելագույնը՝ 45-ը: Ինչ վերաբերում է ընտրողներին, ապա յուրաքանչյուր տնից կարող էր մասնակցել միայն մեկ հոգի: Արական ներկայացուցչի բացակայության դեպքում ընտրությանը կարող էր մասնակցել ընտանիքի իգական սեռի ներկայացուցիչը: Մինչեւ 250—300 ծուխի դեպքում առաջադրվում էր երկրորդ քահանայի նշանակման հարցը¹⁷:

Քահանայության խնդրի հետ կապված իրենց մտահոգություններն էին հայտնում նաեւ Վրաստանի եւ Իմերեթի թեմի հոգեւոր գործիչները, որոնցից էր կոնսիստորիայի անդամ Գրիգորիս քհն. Երզնկյանցը: Նա 1902 թ. իր զեկուցագրերից մեկում նշում է, որ թեեւ բարձրագույն հոգեւոր իշխանությունը վաղուց ձգտում է վերակազմավորել քահանայական դասը՝ համալրելով այն ուսյալ եւ կրթյալ անձանցով, այնուամենայնիվ, դա մնում է լոկ ցանկություն: Ցավոք սրտի, քահանայի աստիճան են ստանում այնպիսի անձինք, որոնք այդ պաշտոնը դիտարկում են միայն որպես իրենց նյութական խնդիրները լուծելու միջոց: Նրանք սկզբում վարում են «տիրացուի պաշտոն», ապա վերջում՝ ծերության հասակում, ծանրանում ծխականների վրա: Զեկուցագրի վերջում Գրիգորիս քհն. Երզնկյանցը կոնսիստորիային առաջարկում էր նախ եւ առաջ հոգեւոր սպասավորներ նշանակել միայն բարոյապես ազնիվ եւ կրթյալ անձանց, ապա նրանց

¹⁶ Տէս Հ. Հովհաննեսյան, նշվ. աշխ., էջ 194:

¹⁷ Տէս ՀԱԱ, ֆ. 53, ց. 1, գ. 239, թ. 33—36 եւ շրջ.:

տալ բավարար ռոճիկ, տրամադրել կատարած արարողություններից հասանելիք բաժինը¹⁸։ Նա նաեւ քահանաներ պատրաստելու համար հատուկ կրթական ծրագիր մշակեց եւ 1905 թ. ներկայացրեց կոնսիստորիային¹⁹։

Վրաստանի եւ Իմերեթի թեմի առաջնորդին ուղղված մեկ այլ զեկուցագրում Գրիգորիս քհն. Երզնկյանցը հարց է առաջադրում, որ թեեւ սրբազանը գյուղական քահանաներից պահանջում է առնվազն չորրորդ դասարանի կրթություն, սակայն պահանջված կրթության բովանդակությունը շատ անորոշ է։ Գրիգորիս քհն. Երզնկյանցը գրում է. «Մինչեւ այժմ քահանայացուների քննելի գիտությունը ինչպէս քանակը, այնպէս եւ ծաւալը եւ պահանջը շատ սահմանափակ եւ թույլ է եղել, որովհետեւ նոցա չէ տրուել պարտադիր եւ մանրամասն ծրագիր, որով նոքա կարող լինէին հրահանգուել իրանց պատրաստութեան համար։ Այդ դժուարութիւնից ազատուելու նպատակով, ես կազմելով մանրամասն ծրագիրներ ինչպէս անհրաժեշտ, այնպէս եւ օժանդակ գիտութիւնների՝ ներկայացնում եմ դոցա յարգոյ Հոգեւոր ատենիդ եւ խոնարհաբար խնդրում քննութեան առնել...»²⁰։

Ըստ Գրիգորիս քհն. Երզնկյանցի՝ գյուղական քահանան պետք է լինեն ոչ միայն հոգեւոր կարիքները հոգացող, այլ նաեւ զինված լինեն գիտելիքով։ Պարտադիր էր համարում Հին եւ Նոր Ուխտի, քրիստոնեական վարդապետության, բարոյագիտության, աստվածաշատության, եկեղեցական եւ հայոց պատմությունների, տոմարի ու հայոց լեզվի ուսուցումը։ Օժանդակ առարկաներն էին՝ թվաբանություն, երկրաչափություն, բնական գիտություններ եւ աշխարհագրություն։ Առաջարկում էր նաեւ քահանաներին զինել բժշկական ամենատարրական գիտելիքներով։ Դա բացատրում էր նրանով, որ քաղաքներում միշտ կան բժիշկներ, իսկ գյուղերում ոչ, ուստի ծայրահեղ դեպքերում քահանան կարող էր նաեւ այդ առումով օգնության հասնել իր ծխի անդամներին։

Ինչպէս տեսնում ենք, Գրիգորիս քհն. Երզնկյանցը եւս քահանայական դասի վերակազմավորման կարեւոր նախապայման էր համարում կրթության, բարոյական հատկանիշների եւ նյութական ապահովության խնդրի լուծման զուգակցումը։

1906 թ. հունվարի 8-ին Եզնիկ ավ. քհն. Երզնկյանի խմբագրությամբ Թիֆլիսում սկսեց լույս տեսնել «Հովիւ» շաբաթաթերթը, որի նպատակն

¹⁸ Տէս անդ, գ. 317, թ. 93–94։

¹⁹ Տէս անդ, գ. 347, թ. 36։

²⁰ Անդ, գ. 347, թ. 36։

էր նպաստել հոգեւոր սպասավորութեան բարեկարգմանը, հոգեւորականների հեղինակութեան վերականգնմանը, հովվի եւ հոտի միջեւ վստահելի, ամուր հարաբերութեւնների հաստատմանը՝ զերծ մնալով դավանաբանական բնույթի հարցերի բարձրաձայնումից²¹:

Ժամանակի մամուլի էջերում բարձրաձայնվում էր նաեւ այն խնդիրը, որ չնայած Թիֆլիսի քահանաները թվով շատ են, սակայն նրանցից քչերն են հետաքրքրվում ընդհանուր ընկերակցական գործունեությամբ: Նրանք հաճախ ապրում եւ գործում են միմյանցից անկախ՝ առանց ներքին կապի²²:

Քահանաների միջեւ ներքին համագործակցային կապի զարգացման, եկեղեցուց դուրս նրանց համար ընդհանուր շփման հարթակի ստեղծման եւ ինքնակրթության խթանման նպատակով բացվեցին նաեւ քահանայական ընթերցարաններ Ախալցխայում եւ Թիֆլիսում:

1880 թ. Վրաստանի եւ Իմերեթի թեմի վիճակային կոնսիստորիայի՝ Ախալցխայի հոգեւոր կառավարությանն ուղղված մի հրամանից պարզվում է, որ Ախալցխայի գավառապետը սկզբնապես արգելել էր քաղաքի հոգեւորականների համար ընթերցարան բացել, քանի որ հանգուցյալ թեմակալ առաջնորդ Գաբրիել արքեպս. Այվազովսկին (1876—1880 թթ.) չէր հասցրել ստանալ նահանգապետի թույլտվությունը²³:

1885 թ. Թիֆլիսի նահանգապետի գրասենյակից Ախալցխայի փոխանորդ Խորեն Ստեփանեանն ուղղված նամակում կարդում ենք, որ Ախալցխա քաղաքում հայ հոգեւոր կառավարության հսկողության ներքո ընթերցարան բացելու թույլտվություն չէր կարող տրամադրվել, քանի որ այդ առնչությամբ չկար Կովկասի քաղաքացիական մասի կառավարչի թույլտվությունը²⁴:

Չնայած դրան՝ ընթերցարանը վերջապես բացվեց: 1884 թ. Աշոտ քհն. Թեմուրազյանը, դիմելով թեմակալ առաջնորդ Արիստակես եպս. Սեդրակյանցին, առաջարկում էր Ախալցխայի օրինակով Թիֆլիսում եւս մատենադարան-ընթերցարան ու ժողովարան բացել²⁵: Ըստ նրա ներկայացրած կանոնադրության²⁶՝ ընթերցարանը պետք է ունենար երկու մասնաճյուղ՝

²¹ Տէս «Հովիւ», 1906, թ. 1, էջ 4:

²² Տէս «Նոր-Դար», 1894, թ. 158, էջ 2. «Արձագանք», 1896, թ. 74, էջ 1:

²³ Տէս ՀԱԱ, ֆ. 355, ց. 1, գ. 351, թ. 29—30:

²⁴ Անդ, գ. 351, թ. 54:

²⁵ Տէս ՀԱԱ, ֆ. 53, ց. 1, գ. 131, թ. 3-ի շրջ.:

²⁶ 1884 թ. կազմված կանոնադրությունը տէս ՀԱԱ, ֆ. 57, ց. 1, գ. 232, թ. 1—5 եւ շրջ.:

գլխավորը բուն քաղաքում, իսկ երկրորդը՝ Հավլաբարի եկեղեցիներից մեկի գավթում: Գրքեր վերցնելու իրավունք էր տրվում նաև միանձնուհիներին²⁷: Թիֆլիսում ընթերցարան բացվեց 1896 թ.²⁸:

Քահանայի դերն ու նշանակությունը մեծ էր բարձրագույն հոգեւոր իշխանության համար, քանզի նա էր ժողովրդի առջեւ Եկեղեցու անմիջական սպասավորը: Ճիշտ է՝ քահանաները առաջնորդող դեր չունեին Եկեղեցու ընդհանուր բարեկարգության, նրա վարչական ղեկավարման գործում, սակայն թեմական իշխանության քայլերն անհետեւանք կարող էին մնալ բանիմաց քահանաների բացակայության պատճառով: Պատահական չէ, որ քահանայի հեղինակության անկումը, ցավոք, ինքնին նշանակում էր հոգեւոր իշխանության վարկանիշի նվազում:

Քահանաների նյութական ապահովության խնդիրը. Վիճահարույց խնդիրներից էր քահանաներին ամսական հաստատուն աշխատավարձ սահմանել-չսահմանելը: Եկեղեցական որոշ գործիչների կարծիքով՝ դա դեմ էր Աստվածաշնչին, մյուսները հակադարձում էին՝ նշելով, որ նախկինում նման փորձ եղել է արդեն:

Թե՛ «Պոլոժենիե»-ով, թե՛ «Ծխական կանոնադրությամբ»²⁹ քահանայի նյութական ապահովության պարտականությունը դրված էր ծխական համայնքի վրա:

Համաձայն 1907 թ. «Ծխական կանոնադրության»՝ ծխական համայնքը դա կարող էր անել հետեւյալ եղանակներով՝

- սահմանել մշտական ռոճիկ,
- տուրքեր վճարել հոգեւոր ծիսակատարությունների համար,
- կամավոր նվիրատվություններ անել,
- գյուղերում՝ հող, կալամաս (տարեհախ) տալ (հոդ. 63):

Հաշվի առնելով այն հանգամանքը, որ քահանայի վարձատրության չափը կախված էր ծխականների թվից, նրանց բարեկեցության աստիճանից՝ հաճախ էր բարձրաձայնվում նաև ծխաբաժանության խնդիրը: Ծխերի քանակի համար քահանաների միջեւ հաճախ վիճաբանություններ էին առաջանում:

Ընդ որում՝ այդպես էր թե՛ Թիֆլիսում, թե՛ թեմի մյուս քաղաքներում ու գյուղերում՝ պայմանավորված ծխականների քանակով, որը կարող

²⁷ Տե՛ս ՀԱՍ, ֆ. 53, ց. 1, գ. 131, թ. 1–14:

²⁸ Տե՛ս «Արձագանք», 1896, թ. 74, էջ 1:

²⁹ Հայ Առաքելական Սուրբ Եկեղեցու «Ծխական կանոնադրությունը» կազմվել է 1900 թ., հաստատվել՝ 1907 թ.: Հետագայում այն ենթարկվել է վերախմբագրությունների: 1907 թ. կանոնադրության արխիվային տարբերակը տես ՀԱՍ, ֆ. 57, ց. 3, գ. 36, թ. 1–15:

էր տարբեր լինել (տե՛ս աղ. 1, 2): Չնայած դրան՝ բարձրագույն հոգեւոր իշխանությունները հատուկ հրահանգներով փորձում էին կարգավորել այդ խնդիրը:

Քահանայի վարձատրութեան անորոշ եւ պատահական լինելը նպաստում էր քահանա-ծխական հարաբերություններում շահերի տարբերութեան առաջացմանը, ինչն անջրպետ էր ստեղծում նրանց միջեւ:

Ըստ Սմբատ քհն. Սարգսյանցի՝ քահանան ծխականի աչքում աստիճանաբար դառնում էր մի շարագուշակ նշան, հաջողութեան ու կյանքին հակադիր մի անձնավորություն³⁰:

Հեղինակի կարծիքով՝ վերոնշյալ իրավիճակի առաջացման գլխավոր պատճառներից մեկը, թերեւս, քահանայի վարձատրութեան անորոշ եւ պատահական լինելն էր³¹: Հաճախ նրանք, եկեղեցական սպասավորությունից զատ, ստիպված էին զբաղվել նաեւ երկրագործությամբ, առեւտրով, կապալներով եւ այլն: Քահանան իր եկամուտն ապահովելու համար ստիպված էր զիջումների գնալ, հարմարվել տեղական սովորույթներին³²:

Ստացվում է, որ քահանաները, իրավիճակից ելնելով, երբեմն ստիպված էին իրենց հիմնական առաքելությանը զուգահեռ զբաղվել նաեւ այլ գործերով: Այս երեւույթը բացասական հետեւանք ուներ, քանի որ ժողովրդի շրջանում քահանայութունը հաճախ դիտվում էր իբրեւ ապրուստի միջոց, սակայն ոչ հոգեւոր սպասավորություն: Ուշագրավ է նաեւ, որ հոգեւորականները եւս միանշանակ չէին վերաբերվում քահանայի, բուն առաքելութունից զատ, նաեւ այլ գործերով զբաղվելուն: Նրանք մի կողմից շեշտում էին դրա բացասական կողմը, մյուս կողմից՝ արդարացնում՝ ելնելով նյութական ապահովության խնդրից:

Գյուտ ավագ քհն. Աղանյանցը եւս այն կարծիքին էր, որ շատ պատճառներ կային, որոնք թույլ չէին տալիս լուծել քահանայական սպասավորության խնդիրը, սակայն դրանցից գլխավորը նրանց նյութական ապահովության հարցն էր: Անհրաժեշտ էր քահանաների համար ոչ միայն մշտական արդյունք ապահովել եւ ռոճիկ նշանակել, այլ նաեւ համակարգվածություն մտցնել: Նա նաեւ տարանջատում էր գյուղական եւ քաղաքային քահանաներին՝ նշելով, որ գյուղականները, թերեւս, ավելի հաստատուն վիճակում էին, քանի որ ունեին վարելահող կամ կալահաց,

³⁰ Տե՛ս ՍՄԲԱՏ ՔԶՆՅ. ՍԱՐԳՍԵԱՆՅ, Դարձեալ գիւղական քահանաների մասին, «Արարատ», ԺԲ., 1907, էջ 1025:

³¹ Այս մասին տե՛ս «Արարատ», Ժ.-ԺԱ., 1907, էջ 892–896:

³² Տե՛ս ՍՄԲԱՏ ՔԶՆՅ. ՍԱՐԳՍԵԱՆՅ, Դարձեալ գիւղական քահանաների մասին, էջ 1027–1029:

իսկ քաղաքայինների դրույթունը շատ ավելի անկայուն էր: Գյուտ ավագ քհն. Աղանյանցը կարծում էր, որ հարկավոր էր կամավոր եւ անորոշ տուրքերը վերացնել, ծիսակատարություններն անվճար դարձնել³³:

Ըստ էության՝ նյութական ապահովության հարցը սերտորեն առնչվում էր քահանայական սպասավորության խնդրին, որի լուծման վերաբերյալ գոյություն ունեցող կարծիքներն աչքի էին ընկնում որոշակի իրարամերժությամբ:

Այսպիսով, կարելի է եզրակացնել, որ քահանայական դասի վերակազմավորման համար առաջնային նախապայման էր նրանց կրթական եւ նյութական ապահովության խնդիրների լուծումը: Հայ Եկեղեցու Վրաստանի եւ Իմերեթի թեմում ձեռնարկված քայլերը չկարողացան ապահովել խնդրի արմատական լուծում, սակայն որոշակի դրական տեղաշարժ գրանցվեց. թեմում առաջին անգամ քահանաներին ամսական հաստատուն աշխատավարձ սահմանելու փորձ կատարվեց: Քահանաների կրթական մակարդակը բարձրացնելու նպատակով՝ թեմական իշխանությունները, կրթական ծրագրերը բարելավելուց զատ, ընթերցարաններ բացեցին Թիֆլիսում եւ Ախալցխայում:

Աղյուսակ 1. 1853 թ. Թիֆլիսի եկեղեցիների միաբան ֆահանգների եւ ծխականների թվի համառոտ ցուցակ³⁴

№	Եկեղեցիների եւ ֆահանգների անունները	տների թիվը	ար.	իգ.
Զրկիմյանց եւ Վանֆի մայր եկեղեցիներ				
1.	Ժամօրհնող Հովհաննես քհն. Սարգսյան	166	490	415
2.	Աստվածատուր քհն. Տեր-Աստվածատրյան	102	132	102
3.	Հովհան քհն. Տեր-Հովհաննիսյան	107	343	337
4.	Մկրտիչ քհն. Տեր-Գրիգորյան	109	294	290
5.	Մարկոս քհն. Տեր-Սարգսյան	96	286	240
6.	Հակոբ քհն. Զառափյան	89	250	213
Կաթողիկե եկեղեցի				
7.	Իսահակ ավագ քհն. Սահառունի	163	443	372
8.	Ստեփանոս քհն. Մանգիրյանց	105	250	216
9.	Աստվածատուր քհն. Կախոյանց	102	205	208

³³ ՏՆՏ ԳԻՒՏ ԱԻ. ՔԶՆՅ. ԱՂԱՆԵԱՆՅ, Քահանաների նիւթական ապահովութեան խնդիրը, «Լուսնայ», գք. Ա., 1896, էջ 247–257:

³⁴ ՀԱԱ, ֆ. 53, ց.1, գ. 469 (2), թ. 271 եւ շրջ.:

10.	Մելիքսեդեկ քհն. Մուրադյան	110	239	214
Մոդնու Ս. Գետրգ եւ Կուսանաց Ս. Ստեփանոս եկեղեցիներ				
11.	Ղազար ավագ քհն. Դավթյան	133	337	285
12.	Ավետիք քհն. Տեր-Ավետիքյան	100	232	235
13.	Սարգիս քհն. [՝]	82	184	179
14.	Զաքարիա քհն. Տեր-Գրիգորյան	82	194	174
15.	Պետրոս քհն. Տեր-Գրիգորյան	76	159	162
Նորաշենի Ս. Աստվածածին եւ Քարափի եկեղեցիներ				
16.	Սրապիոն ավագ քհն. Տեր-Մովսիսյան	91	228	189
17.	Դավիթ ավագ քհն. Շահիկյանց	90	222	188
18.	Սահակ քհն. Տեր-Հարությունյան	103	279	247
19.	Մկրտիչ քհն. Տեր-Գեւորգյան	78	192	164
20.	Ղազար քհն. Տեր-Պետրոսյան	-	-	-
Բերդենեմի Ս. Աստվածածին				
21.	Ժամօրհնող Հովհաննես քհն. Մելիքսեթյան	63	162	129
22.	Մեսրոպ քհն. Տեր-Գրիգորյան	41	92	86
23.	Ստեփանոս քհն. Շահբազյան	42	100	86
Ս. Նշան եկեղեցի				
24.	Ժամօրհնող Իսահակ քհն. Զիալյանց	94	247	219
25.	Անդրեաս քհն. Ամբարդանյանց	99	233	229
26.	Պետրոս քհն. Տեր-Կարապետյան	74	202	162
27.	Գրիգոր քհն. Իզմիրյան	10	19	18
Զիգրաշեն եւ Տափի թաղի Ս. Գետրգ եկեղեցիներ				
28.	Մովսես ավագ քհն. Սյադդնյանց	83	199	160
29.	Հովհաննես քհն. [՝]	102	237	241
30.	Վարդան քհն. Քամոյան	87	248	211
31.	Հովհաննես քհն. Տեր-Պետրոսյան	63	139	129
Հրեշտակապետաց եկեղեցի				
32.	Հովսեփ քհն. Երիցյան	85	180	186
33.	Հարություն քհն. Զմշկյանց	113	281	234
34.	Բարսեղ քհն. Միրադյանց	17	28	28
Ս. Սարգիս ուխտատեղի				
35.	Սիմեոն քհն. Տեր-Սիմոնյանց	64	148	143
36.	Ստեփանոս քհն. Գեւորգյան	40	90	86

**Աղյուսակ 2. 1853 թ. Թելավի գործակալության եկեղեցիների միաբան
 ֆահանաների եւ ծխականների թվի համառոտ ցուցակ³⁵**

№	Եկեղեցիների եւ ֆահանաների անունները	տների թիվը	ար.	իգ.
Թելավի Ս. Գեորգ եկեղեցի				
1.	Գրիգոր քհն. Տեր-Գաբրիելյանց	108	298	265
2.	Հարություն քհն. Տեր-Գեորգյան	112	366	320
3.	Խաչատուր քհն. Սուքիասյանց	105	314	291
4.	Սարգիս քհն. Տեր-Սարգսյանց	103	301	257
5.	Հարություն քհն. Տեր-Մարտիրոսյանց	47	89	91
Զվեգավաճանի Ս. Գեորգ եկեղեցի				
6.	Եսայի քհն. Մամայանց	101	297	287
7.	Աստվածատուր քհն. Մամաջանյանց	92	328	245
Ռուխպիրի Ս. Աստվածածին եկեղեցի				
8.	Մելիքսեդեկ քհն. Տեր-Բարսեղյան	69	281	235
Քիստավուրի Ս. Աստվածածին				
9.	Իսահակ քհն. Տեր-Հակոբյան	82	367	281
Սանիրի Ս. Աստվածածին				
10.	Զաքարիա քհն. Տեր-Բարսեղյանց	88	306	326
	Լոմիսցիի Ս. Սարգիս եկեղեցի			
11.	Սիմեոն քհն. Տեր-Մովսեսյան	50	116	130
Դորել Ս. Աստվածածին				
12.	Սողոմոն քհն. Տեր-Հարությունյան	40	111	100
Ուրխաբուրանի Ս. Սարգիս եկեղեցի				
13.	Հովհաննես քհն. Տեր-Հարությունյան	75	311	278

РЕЗЮМЕ

Священнический вопрос всегда был в центре внимания епархиальных властей Грузино-имеретинской епархии Армянской Апостольской Церкви. Для решения этого вопроса в годы предводительства епископа Аристакаса Седракянца (1883—1889) и архиепископа Геворка Суренянца (1894—1904) были предприняты активные шаги.

³⁵ Անդ, թ. 298 եւ շրջ.։

Епархиальных архиереев особенно волновало снижение авторитета приходских священников среди населения, что было результатом проблем, накопившихся десятилетиями. Основные из них касались обеспечения надлежащего образовательного уровня и решения вопроса материальной обеспеченности священников. Для решения этих проблем были предприняты шаги по улучшению образовательных программ и регулированию системы оплаты священников. В 1900 году была предпринята первая попытка назначить ежемесячную зарплату священникам в Батуми, которая, к сожалению, не распространилась на всю епархию. Работа в этом направлении продолжалась и в последующие годы. Особое внимание обращалось также на создание условий для самообразования священников. Для этого были открыты читальные залы в Ахалцихе и Тбилиси.

SUMMARY

Priestly issues have always been in the focus of attention of the diocesan authorities of the Georgian-Imeretian Diocese of the Armenian Apostolic Church, and for their solution, active steps were taken during the years of the diocesan rule of Bishop Aristakes Sedrakants (1883—1889) and Archbishop Gevorg Surenyants (1894—1904).

The diocesan authorities were especially worried about the lack of authority of parish priests among the population resulted by problems accumulated during decades, which mainly concerned the appropriate educational level of the clergy and the issue of their material security. To address these problems, steps were taken to improve educational programs and regulate the payment system for priests. In 1900, the first attempt was made to assign a monthly salary to priests in Batumi, which, unfortunately, did not apply to the entire diocese. Attempts in this direction were still made in subsequent years. Special attention was also paid to creating conditions for the self-education of priests. For that purpose, reading rooms were opened in Akhaltsikhe and Tbilisi.

